

言庸謹今雖被罪頃在二品之列當杜門謝客悔罪不暇而略不顧畏與無賴之徒交相宴集致有此事請速推治移配他處傳曰觀庸謹之招曰不得已而赴召然果如所啓而略不顧畏交相群飲甚為非矣但推於其道乎拿來而推考乎其問之回啓曰下傳旨令其道推考使朝廷皆知庸謹之非也傳曰其推考移配○傳曰僧人道熙之事已令金德純一族及三切隣事知奴子素知朋友質見矣但一族及奴子相為容隱若令朋友質見則亦有紛擾之弊宜問三切隣而已但宣傳官吏官有素知者則令往視之○夜良巽方有氣如火○乙亥史官閔齊仁黃恬宣傳官尹泗等受命往禁府而來復命曰德純面長目細而斜今見道熙則面圓而小目廣而大矣審視則形體頓殊定非德純矣傳曰知道今觀道熙推案則其招辭曰以儒生供飯僧所任遲耽海南縣監捉囚推問酷用刑杖以金湜子德純怯招之矣實則德源居李士元之子也云其供稱係德源李士元之子則為守令者當移文其郡真偽閱實然後上聞可也今乃務於要功脅以取招欺罔朝廷其失甚大終當治罪矣姑令義禁府憑問德純家三切隣等人果非德純則道熙之父及同生切族在德源者二三人羅將叢遣拿來推問○義禁府都事